

道德真經廣聖義序

卷一

序曰珠胎玉札云太上老君降跡行教遠近有四其一歷劫業形隨方演化即千二百號百八十名散在諸經可得徵驗矣其二此劫開皇之始運道之功孕育乾坤胞胎日月為造化之本為天地之根播氣分光生成品彙自五大之首逮殷周之前為帝王師代代應見即鬱華錄圖廣成尹壽因機表號是也三皇迭往五帝不歸雲紀龍師時遷數章鳥官火運川逝風移步驟不同澆淳漸變雖揖讓斯在而干戈屢興阪泉有翦戮之師丹浦有專征之旅智詐行而大獲隱仁愛顯而孝慈生玄默希夷日以寤薄陶唐以老昏厭位衰舜以歷試登庸憂軫萬方服勤庶政老君號尹壽子居于河陽以道德真經降授于舜經之首也道以無為居先德以有稱為次亦猶三皇之書言大道也五帝之書言常道也其下薄裁非之義節兼愛之仁損俯仰之禮挂銘巧之智斥用兵之暴抑諂詐之謀使人復朴還淳以無為無事為理舜雖力而行之窟

道德真經廣聖義序

凶舉相明目達聰敦睦九族平章百姓而恬和清靜之道莫能致也故禹湯之後天下為家各親其親各子其子大道既隱玄化不流禮樂滋繁政刑大用矣其三老君以商陽甲之代降神寓胎武丁之年誕生於亳即今真源縣九龍井太清宮是其地也或隱或顯潛化羣方當周昭王癸丑之年以此二經授關令尹喜傳於天下世得而闡焉其四將化流沙與尹喜期會於西蜀青羊之肆示現降生即昭王丁巳之年也此道德經自函關所授

累代尊行哲后明君鴻儒碩學詮疏箋註六十餘家則有節解上下尹喜解內解上下尹喜解句漢文帝時降居陝州嚴君平指歸十四卷漢文帝時有廟見存嚴君平指歸十四卷漢人名遵山陽王弼注字輔嗣魏時南陽何晏字平叔魏時河南郭象字子玄向秀弟穎川鍾會字士季魏時隱士孫登明二帝時人晉僕射太山羊祜字叔子沙門羅什本西胡人因法二卷沙門圖澄後趙時西國胡僧沙門僧肇晉時人梁隱居陶弘景武帝時人貞白先生注四

卷一 范陽盧裕後魏國子博士一草萊臣劉仁會後魏伊州人吳郡徵士顧歡字榮伯南齊松靈仙人隱居山無晉人河東裴楚恩秦人京兆杜弼宋人河南張憑宋明帝太常博士梁武帝蕭衍通鑑四卷梁簡文帝清河張嗣知年代梁道士臧玄靜字道宗梁道士孟安排號大五梁道士孟智周號小孟梁道士竇略號武帝陳道士諸赫作玄覽隋道士劉進喜宗無異隋道士李禧注上下唐大史令傅奕注二

唐嵩山道士魏徵作安義五卷法師宗文明作義泉仙人胡超作義山十卷道士安丘五卷道士尹文操作簡要法師章錄夫肅明觀主尹愔作新義道士徐遵直翰林道士何思遠作指趣二卷衡嶽道士薛季昌作金鑑十卷洪源先生王毅注二卷法師趙堅六卷太子司議郎楊上善高宗時人道士史部侍郎賈至作述義十卷道士車弼七卷任真子李榮注上下成都

道士黎元興四卷注義太原少尹王光庭作英
 二道士張惠超作志玄藝法師四卷道義
 郡道士任太古注二道士冲虛先生殿中監
 申甫五卷岷山道士張君相作集解道士成
 玄英六卷漢州刺史王真上下二卷義道
 士符少明作道玄宗皇帝所注道德上下
 二卷六卷即今所廣疏矣所釋之理諸家不
 同或深了重玄不滯空有或爾推因果偏執
 三生或引合儒宗或趣歸空寂莫不並深驪
 室競擷珠璣俱陟鍾山爭窺瑤瑤連城在握
 照乘盈懷敷引則光榮縹緲演暢則彩文編
 簡語內修則八瓊玉雪零霽於丹田九轉琅
 膏晶爇於絳闕盡六氣迴環之妙臻五靈夾
 輔之功忘之於心息之於踵得無所得而了
 達化元矣語品證也則擺落細塵超登上秩
 遊八外而放曠指三境而躋昇蹈太一之位
 矣而愬內外之要兼人天之能者未有其倫
 我開元至道昭肅考皇帝降神龍變接統象
 先載內難以乘乾宮中興而御極無為在宥
 四十五年汾水襄城靡勞輟迹具茨大隗自

得朋遊靡八溟為仁壽之庭普萬寓為華胥
 之國至道至德超哉明哉欽若尊經本朝家
 教象繫不足以擬議風雅不足以指陳橫亘
 古今獨立宇宙雖諸家染翰未窮衆妙之門
 多士研精莫造重玄之境凝旒多暇屬想有
 歸躬注八十一章製疏六卷內則修身之本
 囊括無遺外即理國之方洪纖畢舉宸藻遐
 布奪五雲之華天光煥臨增兩曜之色固可
 以季仲十翼輝映二南若親稟於玄元信躬
 傳於太上冠九流而首出垂萬古而不刊則
 大風朱鷹之誦誠難接武典論金樓之作詎
 可同年但以疏註之中引經合義周書魯史
 互有發明四始漆園或申屬類後學披卷多
 著本源輒採撫衆書研尋篇軸隨有比況咸
 得備書纂成廣聖義三十卷大明在上而燭
 火不休巨澤溥天而灌溉不息誠不知量粗
 備闕文天復元年龍集辛酉九月十六日甲
 子序

道德真經廣聖義卷之一
 唐廣成先生杜光庭述
 叙經大意解疏序引
 將釋此經大分二段先明製疏後解正文今
 初述製疏之由者我大唐玄宗皇帝垂衣之
 暇鍾想妙門以大道為天地原根老君乃玄
 元聖祖二經敷演綿歷歲年說自舜朝傳於
 周代詮註疏解六十餘家言理國則嚴氏河
 公楊籙自得述修身則松靈想爾逸軌難追
 其間梁武簡文僧肇羅什臧陶顧孟霞舉於
 南朝任黎二張星羅於西蜀其餘祖述互有
 否臧未盡發揮執窺堂奧以開元十一年躬
 為註解下詔曰在昔元聖強著玄言
 義云詔者勅命之書也在天子為詔為誥
 為勅為制在皇后太子諸王為教為令皆
 君命於臣上命於下之詞也曰者字林云
 曰者從口出言為曰亦云張口吐舌為曰
 說文云曰詞也從口乙聲象口出氣有聲
 而成言詞也故云曰昔者往也在者存也
 元者始也聖者靈通之德也書曰睿作聖